



ANTEPROXECTO DE LEI DE ESTATÍSTICA DE GALICIA

EXPOSICIÓN DE MOTIVOS

I

A estatística pública é unha actividade estreitamente vencellada á democracia. Non se trata só de gobernar cun sólido soporte informativo, senón de que este se xere de acordo con padróns científicos e se transmita con obxectividade e de xeito imparcial. O sistema estatístico público debe permitir aos responsables políticos atinar nas súas decisións e á cidadanía exercer plenamente os seus dereitos.

Baixo estas premisas, o artigo 27.6 da Lei orgánica 1/1981, do 6 de abril, do Estatuto de autonomía de Galicia atribúe á Comunidade Autónoma competencia exclusiva na materia, previsión que se desenvolveu coa Lei 9/1988, do 19 de xullo, de estatística de Galicia, modificada por Lei 7/1993, do 24 de marzo, Lei 10/2001, do 17 de decembro, Lei 16/2006, do 27 de decembro e Lei 8/2011, do 9 de novembro. Nela establécense o marco normativo básico, a estrutura organizativa e os instrumentos de planificación da estatística galega. Os anos transcorridos desde a súa aprobación aconsellan revisala á luz da experiencia propia e tendo en conta a achega de regulamentación, o desenvolvemento das tecnoloxías da información e a potencialidade das novas fontes de datos.

Detrás da experiencia está a aprendizaxe acumulada logo de avaliar cinco plans aprobados polo Parlamento e executados pola organización estatística da Comunidade Autónoma, establecida no título II da Lei 9/1988, do 9 de xullo, e da que forman parte o Instituto Galego de Estatística, os órganos estatísticos sectoriais e o Consello Galego de Estatística. En cumprimento do previsto no referido título, ditáronse o Decreto 173/2007, do 30 de agosto, polo que se establece a forma de designar aos membros do Consello Galego de Estatística, o Decreto 24/2008, do 21 de febreiro, polo que se regulan os órganos estatísticos sectoriais e se establece o procedemento de designación e o Decreto 60/2016, do 26 de maio, polo que se aproba o Estatuto do organismo Instituto Galego de Estatística, este último acorde coa Lei 16/2010, do 17 de decembro, de organización e funcionamento da Administración xeral e do sector público autonómico de Galicia.

Coa Lei 12/1992, do 9 de novembro, de creación de determinadas escalas de persoal funcionario ao servizo da Xunta de Galicia e a Lei 2/2015, do 29 de abril, do emprego público de Galicia, créanse e tipifícanse as escalas superior e técnica de estatística, o que, xunto coa dotación de prazas de axentes

entrevistadores-enquisadores do Instituto Galego de Estatística, permitiu achegar á organización estatística os recursos humanos necesarios para cumprir as súas funcións.

Entre a lexislación autonómica por considerar están a Lei 2/2011, do 16 de xuño, de disciplina orzamentaria e sustentabilidade financeira, o Decreto Lexislativo 2/2015, do 12 de febreiro, polo que se aproba o texto refundido das disposicións legais da Comunidade Autónoma en materia de igualdade e a Lei 5/2021, do 2 de febreiro, de impulso demográfico de Galicia. As responsabilidades do Instituto Galego de Estatística na planificación orzamentaria e a introdución das perspectivas de xénero e idade na estatística son consecuencias delas.

En relación cos principios de accesibilidade, coordinación e cooperación que deben presidir a estatística pública hanse de considerar a Lei 37/2007, do 16 de novembro, sobre reutilización da información do sector público, a Lei 39/2015, do 1 de outubro, do procedemento administrativo común das administracións públicas e a Lei 40/2015, do 1 de outubro, de réxime xurídico do sector público, aprobadas polas Cortes Xerais. Na difusión de información teranse en conta as previsións da Lei 1/2016, do 18 de xaneiro, de transparencia e bo goberno, do Parlamento de Galicia e da Directiva (UE) 2016/2102 do Parlamento Europeo e do Consello, do 26 de outubro de 2016, sobre accesibilidade dos sitios web e aplicacións para dispositivos móbiles dos organismos do sector público.

A este marco normativo cómpre engadir o Regulamento (CE) nº 223/2009 do Parlamento Europeo e do Consello, do 11 de marzo do 2009, relativo á estatística europea, e, con carácter supletorio, a Lei 12/1989, do 9 de maio, da función estatística pública, que limita o seu ámbito de actuación ás estatísticas para fins estatais desenvolvidas pola Administración xeral do Estado, sen aspirar, tal e como se reflicte na súa parte expositiva, a regular un sistema estatístico xeral que inclúa a actividade do Estado e das comunidades autónomas, cuxa conexión só pode entón resultar da cooperación. Baixo estas premisas, a Lei 12/1989, do 9 de maio, crea o Comité Interterritorial de Estatística, órgano con representación dos servizos estatísticos central e autonómicos, pero que non está facultado para tomar decisións vinculantes nin está a ser quen de sustentar un esquema eficaz de cooperación. Esta situación perdura logo de modificarse a Lei 12/1989, do 9 de maio, dentro da Lei 13/2022, do 7 de xullo, xeral de comunicación audiovisual, para reforzar o papel da estatística pública e adaptala á regulamentación europea.

A estatística galega tivo que madurar neste marco potencialmente integrado por dezoito sistemas estatísticos en España, obrigados a cooperar para xerar ofertas estatísticas acordes coas necesidades propias de información e as boas prácticas europeas e internacionais na materia. Un fito que resultou clave neste percorrido foron os denominados acordos de Carmona de 2008, asumidos polo Instituto Nacional de Estadística e os órganos centrais de estatística das comunidades autónomas para compartir información. Antes, no 2005, vira a luz o informe titulado “A organización da estatística pública en España, situación actual e propostas de mellora”, redactado por un grupo de persoas expertas independentes. As súas reflexións e conclusións seguen achegando luz sobre o presente e o futuro da estatística pública en España.

Con respecto ao tratamento de datos persoais estarase ao disposto no Regulamento (UE) 2016/679 do Parlamento Europeo e do Consello, do 27 de abril de 2016, relativo á protección das persoas físicas no que respecta ao tratamento de datos persoais e á libre circulación destes datos e polo que se derroga a Directiva 95/46/CE (de protección de datos), así como na Lei Orgánica 3/2018, do 5 de decembro, de protección de datos persoais e garantía dos dereitos dixitais.

Dentro desta normativa, o ámbito da función estatística pública recibe un trato especial, por considerar que os fins estatísticos, xunto cos de investigación científica e histórica, son compatibles cos fins determinados, explícitos e lexítimos cos que se recollen datos persoais. No entanto, esta excepción á limitación sobre finalidade puntualízase coa previsión de que a comunicación e o tratamento de datos persoais con fins estatísticos serán lícitos se a estatística para a que se requiren vén esixida por una norma de dereito da Unión Europea, ou está incluída nos instrumentos de programación estatística legalmente previstos. Esta excepcionalidade tamén modula as solicitudes de exercicio dos dereitos dos afectados.

O cadro común europeo de calidade, cuxa pedra angular é o Código de conduta adoptado no 2017 polo Comité do Sistema Estatístico Europeo, foi introducido expresamente como instrumento autorregulador nas leis dos plans galegos de estatística aprobadas para o decenio 2017-2026, e deberá seguir guiando no futuro a actividade sometida a esta lei.

Dos dezaseis principios do código, que abranguen a contorna institucional, os procesos estatísticos e a produción estatística, esta lei afondará particularmente nos vencellados co emprego de procedementos

axeitados, cooperación, carga de resposta, rendibilidade, actualidade, puntualidade e comparabilidade.

A razón é que todos achegan mencións expresas e indicadores sobre a necesidade de considerar os rexistros e sistemas de información como recursos estratéxicos dos sistemas estatísticos e figuras claves para aproveitar os avances tecnolóxicos e o desenvolvemento exponencial que está a experimentar a información dispoñible.

Cómpre, cando menos, conseguirmos incorporar plenamente os de orixe administrativa, garantindo por norma que estean á disposición do sistema estatístico público, para integralos en bases de datos e aumentar os estándares de calidade.

Rexistros estables e convenientemente actualizados deberían sustentar, non só desagregacións territoriais non asumibles con enquisas, senón tamén temporais, de xeito que as series diarias ou as estimacións en tempo real deixen de ser meras aspiracións. Sensibilizar aos responsables da información administrativa sobre a utilidade externa que pode chegar a ter, aumentar a precisión das previsións para deseñar e avaliar políticas públicas ou dispor de datos cara a afrontar o reto medioambiental e o perfeccionamento do sistema de contas, serían outros logros.

Como contrapartida, a lei introducirá unha regulamentación máis precisa sobre segredo estatístico e reforzará o papel do Instituto Galego de Estatística como organismo coa capacidade técnica e a cobertura xurídica necesarias para acceder á información administrativa e integrala en bases de datos de finalidade estatística.

A lei incorporará disposicións de adecuación á normativa mencionada e outras para ir axustando a estatística galega aos cambios que previsiblemente terán lugar nos vindeiros anos.

II

Na súa parte dispositiva, a lei ten un título preliminar, catro títulos, seis disposicións adicionais, unha disposición derogatoria e dúas disposicións finais.

No título preliminar determínanse o seu obxecto e ámbito de aplicación, as definicións, os principios xerais e o compromiso coa calidade da estatística galega. O título I sobre gobernanza estatística divídese en catro capítulos nos que se establece o modelo organizativo, integrado polo Instituto Galego

de Estatística, os órganos estatísticos sectoriais e o Consello Galego de Estatística. Os tres capítulos do título II refírense á produción estatística desde as súas dimensións de planificación, obtención de información e publicación de resultados. Por último, nos títulos III e IV regúlanse o segredo estatístico e o réxime sancionador.

A disposición adicional primeira establece o Rexistro de poboación como base estatística e canle para facilitar a comunicación da administración coas persoas residentes. A segunda vincula estatística e planificación pública, a terceira refírese aos órganos superiores de goberno do Instituto Galego de Estatística e a cuarta ao seu plan anual de actuación, concibido como instrumento complementario e de apoio das responsabilidades que lle correspondan na programación estatística anual. Nas disposicións adicionais quinta e sexta prevénse o acceso ás bases de datos de persoas xurídicas e a revisión das contías das sancións por infraccións en materia estatística.

III

Esta lei axústase aos principios de boa regulación establecidos no artigo 37.a) da Lei 14/2013, do 26 de decembro, de racionalización do sector público autonómico, por responder con proporcionalidade e eficiencia á satisfacción de necesidades de interese xeral e por prever e xustificar os obxectivos perseguidos.

No seu procedemento de elaboración promoveuse a participación cidadá e respectáronse as obrigas de publicidade nos termos previstos na Lei 1/2016, do 18 de xaneiro, de transparencia e bo goberno. Na tramitación do seu anteproxecto emitíronse os informes preceptivos da Asesoría Xurídica Xeral, da Dirección Xeral de Planificación e Orzamentos, da Dirección Xeral de Simplificación Administrativa, da Secretaría Xeral de Igualdade e da Dirección Xeral de Familia, Infancia e Dinamización Demográfica.

Ademais, en aplicación do artigo 46 da Lei 9/1988, do 19 de xullo, o Consello Galego de Estatística foi consultado sobre o anteproxecto, que tamén foi obxecto do ditame do Consello Económico e Social de Galicia.

Por todo o exposto, o Parlamento de Galicia aprobou e eu, de conformidade co artigo 13.2 do Estatuto de autonomía de Galicia e co artigo 24 da Lei 1/1983, do 22 de febreiro, de normas reguladoras da Xunta e da súa Presidencia, promulgo en nome de El-Rei a Lei de estatística de Galicia.

TÍTULO PRELIMINAR

Disposicións xerais

Artigo 1. *Obxecto*

Esta lei regula a estatística para os fins de Comunidade Autónoma de Galicia, entendida como a produción e difusión de información, mormente cuantitativa, que representa un fenómeno colectivo referido ás realidades demográfica, social, cultural, económica, financeira e ambiental de Galicia e, en xeral, a calquera cuestión relativa ás competencias da Comunidade Autónoma.

Esta lei non regula as enquisas de opinión, nin as electorais ás que se refire o artigo 69 da Lei orgánica 5/1985, do 19 de xuño de réxime electoral xeral.

Artigo 2. *Ámbito de aplicación*

Esta lei ordena e protexe a función estatística realizada polo sector público autonómico de Galicia. Tamén será de aplicación á de interese da Comunidade Autónoma que, por acordo, convenio ou contrato, for realizada polos entes locais, as universidades ou calquera outra entidade de dereito público ou privado.

Artigo 3. *Definicións*

1. Estatística galega: conxunto de métodos, técnicas e procedementos destinados a recompilar, almacenar, elaborar e analizar sistematicamente información cuantificable para producir e difundir estatísticas de interese de Galicia, así como para realizar outros labores necesarios ou útiles para o coñecemento cuantitativo da realidade galega.

2. Estatística: actuación concreta que se pode programar como operación ou actividade estatística. A primeira execútase consonte un proxecto técnico aprobado polo Consello Galego de Estatística e coa participación dunha entidade pública galega nalgunha fase previa á súa difusión. A segunda realízase a partir dunha metodoloxía orientada a aproveitar a información existente para elaborar e difundir resultados estatísticos que amplíen os dispoñibles sobre Galicia.

3. Operación nova: operación programada nos estados de implantación ou reestruturación, para comprobar a viabilidade do seu proxecto técnico ou da súa modificación, respectivamente.

4. Operación corrente: operación programada nos estados de en curso ou cumprimento, segundo quen deseñase orixinariamente o seu proxecto técnico, unha administración galega ou outra, respectivamente.

5. Actuación de interese estatístico: labor auxiliar ou incipiente que, á partida, non persegue ampliar a información dispoñible sobre Galicia. As auxiliares englábanse en actividades de interese estatístico.

6. Dato persoal: dato individual sobre unha persoa física ou xurídica identificada ou identificable. Considerarase identificable toda persoa física ou xurídica cuxa identidade se poida determinar, directa ou indirectamente. Para determinar a identificabilidade indirecta, teranse en conta aqueles medios que razoablemente puiden empregar un terceiro para recoñecela.

7. Identificador: dato persoal que permite identificar directamente a unha persoa física ou xurídica, en particular, nome, apelidos, domicilio ou un número de identificación publicamente accesible.

8. Microdatos: conxunto de datos individuais empregados na estatística para producir información agregada.

9. Metainformación: información usada para describir as características das series e dos datos estatísticos, detallando conceptos e metodoloxías relevantes envoltos na súa produción e emprego.

10. Datos administrativos: datos recollidos por entidades do sector público ou por persoas privadas que presten servizos públicos, incluíndo os baseados en actuacións ou procedementos que non teñen un fin primario estatístico.

11. Informante: persoa física ou xurídica que fornece datos.

12. Declaración ou comunicación: dato fornecido polo informante.

13. Observación: dato público captado directamente.

14. Recolla de datos: enquisas ou outros procedementos de conseguir información de diversas fontes, mesmo das administrativas.

15. Tratamento estatístico: conxunto de accións relacionadas coa recolla, almacenaxe, elaboración e ordenación necesarias para realizar estatísticas.

16. Difusión estatística: conxunto de accións para pór os resultados estatísticos á disposición das persoas usuarias.

17. Proxecto técnico: documento no que se recollen os procedementos para elaborar e difundir unha operación.

18. Ficheiro de datos: conxunto organizado de datos, calquera que fose a forma empregada para a súa creación, almacenamento, ordenación ou acceso.

19. Estatística de síntese: estatística que se elabora combinando diversas fontes de información, entendendo por combinación, non a compilación das devanditas fontes, senón a elaboración contable ou matemática, mediante estatísticos derivados, da información.

Artigo 4. *Principios estatísticos*

1. A estatística galega adecuarase aos seguintes principios:

a) Autoridade: a estatística galega desenvolverase consonte á normativa emanada dos poderes competentes na materia e de acordo cos estándares, prácticas e principios científicos que aseguren a súa corrección técnica, o que supón recorrer a normas profesionais e éticas e garantir a transparencia cara ás persoas informantes e usuarias.

b) Independencia profesional: as estatísticas débense preparar, elaborar e difundir de xeito independente e sen presión dos grupos políticos ou de interese, sobre todo no que concirne á selección de técnicas, definicións, metodoloxías e fontes por utilizar, así como ao calendario e á forma e contido da difusión.

c) Imparcialidade: as estatísticas débense preparar, elaborar e difundir de xeito neutral, tratando por igual a todas as persoas ou entidades informantes e usuarias.

d) Segredo estatístico: para salvagardar a intimidade da cidadanía e garantir a confianza na estatística galega, os datos persoais obtidos polos órganos estatísticos estarán debidamente protexidos, quedando prohibidos o seu uso con fins non estatísticos e a súa revelación ilegal.

e) Rendibilidade: os custos de elaborar estatísticas han de ser proporcionais á importancia dos resultados e beneficios buscados, os recursos deben ser ben empregados e cómpre minimizar a carga de resposta. Utilizar como fonte prioritaria de información a dispoñible nos ficheiros administrativos, estatísticos ou doutro tipo, e promover o seu enlace con fins estatísticos están en liña con este principio.

f) Coordinación e cooperación: a estatística galega seguirá prácticas de estrita coordinación interna e de fomento da cooperación externa. Os convenios e acordos en materia estatística con outras administracións

públicas ou entes privados permitirán aproveitar os labores de interese común e non duplicar as solicitudes de información.

Artigo 5. Calidade estatística

1. Para garantir a calidade dos resultados, a estatística galega desenvolverase conforme a normas uniformes e métodos harmonizados. A este respecto, aplicaranse e mediranse os seguintes criterios de calidade:

a) Pertinencia: as estatísticas deseñaranse en función das necesidades das persoas ou entidades usuarias e do interese do conxunto da sociedade galega.

b) Precisión: as estatísticas deben reflectir con fidelidade os fenómenos ou características para os que foron deseñadas.

c) Actualidade e puntualidade: as estatísticas deben minimizar o prazo transcorrido entre a dispoñibilidade da información e o fenómeno descrito e difundirse segundo un calendario, respectando as datas sinaladas nos instrumentos de programación.

d) Accesibilidade e claridade: as estatísticas difundiranse garantido o acceso neutral e doado das persoas ou entidades usuarias, e achegando información complementaria para facilitar o seu uso e interpretación.

e) Coherencia e comparabilidade: as estatísticas realizaranse sobre a base de normas comúns con respecto ao alcance, definicións, unidades e clasificacións.

2. Correspóndelle ao Instituto Galego de Estatística a iniciativa sobre o control da calidade da estatística galega.

TÍTULO I

Gobernación estatística

CAPÍTULO I

Organización estatística galega

Artigo 6. Natureza

A organización estatística galega é o conxunto de órganos que actúan de xeito coordinado para desenvolver a estatística galega, mediante a execución, avaliación e seguimento da súa planificación, contemplada no título II desta lei.

Artigo 7. Composición

Forman parte da organización estatística galega:

- a) O Instituto Galego de Estatística
- b) Os órganos estatísticos sectoriais
- c) O Consello Galego de Estatística

CAPÍTULO II

Instituto Galego de Estatística

Artigo 8. Natureza

1. O Instituto Galego de Estatística é o órgano central da organización estatística e ten como principais misións as de dirixir e coordinar a estatística galega.

2. O Instituto Galego de Estatística é un organismo autónomo con personalidade xurídica pública diferenciada respecto da Administración xeral da Comunidade Autónoma, autonomía de xestión para cumprir os seus fins e patrimonio e tesourería propios.

3. O Instituto Galego de Estatística quedará adscrito á consellería competente en materia de facenda.

4. No desenvolvemento das competencias técnicas e na aplicación do segredo estatístico, o Instituto Galego de Estatística gozará da capacidade funcional necesaria para garantir a súa neutralidade operativa. Son competencias técnicas o deseño de conceptos, definicións, unidades, clasificacións, nomenclaturas, códigos e outros estándares, para ordenar datos e presentar resultados, así como as que versen sobre fórmulas, algoritmos, procedementos de recolla, tratamento e difusión de información.

5. O Instituto Galego de Estatística rexerase polo disposto nesta lei e nas outras normas que lle sexan de aplicación. En particular, como entidade do sector público autonómico de Galicia, pola Lei 16/2010, do 17 de decembro, de organización e funcionamento da Administración xeral e do sector público autonómico.

Artigo 9. Funcións

1. No ámbito da estatística galega, correspóndelle ao Instituto Galego de Estatística:

- a) Representar oficialmente ao sector público autonómico de Galicia en materia estatística e canalizar as relacións externas na dita materia.
- b) Coordinar os órganos estatísticos sectoriais regulados no capítulo III.
- c) Elaborar o anteproxecto de lei do Plan galego de estatística e os proxectos de decreto dos programas que o desenvolven, en colaboración cos órganos estatísticos sectoriais.
- d) Analizar as necesidades e a evolución da demanda de estatísticas para Galicia.
- e) Relacionarse con organismos estatais, europeos e internacionais con competencias estatísticas e proporlle ao Consello da Xunta de Galicia integrarse neles.
- f) Realizar as estatísticas e outras actuacións que se lle encomenden nos instrumentos de planificación previstos no título II desta lei.
- g) Colaborar nas estatísticas de interese estatal e supraestatal promovidas polos organismos competentes.
- h) Coordinar as peticións en materia estatística dos órganos ou entidades do sector público autonómico galego dirixidas a outros órganos ou entidades públicas.
- i) Promover a aplicación de normas e requisitos técnicos unitarios para a estatística galega e aprobar conceptos, definicións, unidades, clasificacións, nomenclaturas, códigos e outros estándares de interese propio, procurando que se adapten e integren cos homólogos de uso obrigatorio nos ámbitos estatal, europeo e internacional.
- k) Realizar, promover e divulgar a investigación, o desenvolvemento, a innovación e o coñecemento no ámbito da estatística galega.
- l) Promover a formación e o perfeccionamento profesional do persoal estatístico.
- m) Prestar servizos de asistencia técnica aos órganos estatísticos sectoriais, para realizar as actuacións que se lles encomenden nos instrumentos de planificación estatística.
- n) Desenvolver bases de datos e prestar servizos de recompilación e almacenaxe da información estatística dispoñible.

ñ) Asegurar a difusión dos resultados estatísticos sobre Galicia e estender as certificacións previstas no artigo 30.3.

o) Velar polo cumprimento das normas técnicas aprobadas e pola aplicación dos principios e garantías necesarios para que se respecten o segredo estatístico e as outras condicións xurídicas ás que se debe suxeitar a estatística galega.

p) Desenvolver modelos de predición e análise socioeconómica para a planificación a medio e longo prazo.

q) Elaborar anualmente e difundir unha memoria sobre a actividade da organización estatística galega.

r) As demais competencias previstas nesta lei e as que se lle atribúan legalmente.

2. Os órganos ou entidades do sector público autonómico consultarán con carácter previo ao Instituto Galego de Estatística sobre:

a) Rexistros administrativos e sistemas de información de posible tratamento estatístico, así como das modificacións que puideren implicar cambios en dito tratamento.

b) Preparación e reforma de procedementos administrativos que poidan ter consecuencias sobre a produción de información de posible aproveitamento estatístico.

c) Convenios e acordos en materia estatística que subscriban.

d) Ficheiros de datos para fins estatísticos que remitan a outra administración, en cuxo caso o Instituto Galego de Estatística recibirá unha copia deles.

e) Plans de carácter xeral por abranguer varios ámbitos ou sectores cando puideren precisar información elaborada ao amparo dos instrumentos de planificación estatística.

Artigo 10. *Organización*

1. A estrutura orgánica do Instituto Galego de Estatística establécese no seu estatuto, aprobado por decreto.

2. A persoa titular da Dirección do Instituto Galego de Estatística é a máxima autoridade da Comunidade Autónoma no ámbito da estatística

galega e actuará con total independencia nas materias técnica e científica relacionadas coa dita función.

3. A persoa titular da Dirección do Instituto Galego de Estatística terá a condición de alto cargo da Administración da Comunidade Autónoma, será nomeada por decreto e reunirá requisitos de solvencia académica, profesional, técnica ou científica, en materia estatística.

4. Correspóndelle á persoa titular da Dirección do Instituto Galego de Estatística:

a) Representalo legalmente.

b) Exercer a xefatura do seu persoal.

c) Representar á Comunidade Autónoma nos órganos de participación institucional en materia estatística, dirixir as relacións cos servizos estatísticos doutras administracións públicas, organizacións europeas e internacionais e coordinar os que integran a organización estatística galega.

d) Todas as demais funcións que lle competan ao Instituto Galego de Estatística e que non fosen atribuídas expresamente a outros órganos deste.

Artigo 11. *Réxime económico*

1. O Instituto Galego de Estatística rexerase pola normativa da Comunidade Autónoma sobre réximes económico-financeiro e orzamentario, intervención, control financeiro, contabilidade e rendición de contas.

2. Os recursos económicos do Instituto Galego de Estatística son:

a) Os bens e valores que constitúen o seu patrimonio e os produtos e rendas del.

b) As asignacións dos orzamentos xerais da Comunidade Autónoma de Galicia ou as procedentes doutras entidades públicas.

c) Os ingresos propios por labores que se realicen para outras entidades en virtude de acordos ou disposicións legais.

d) Os demais ingresos de dereito público ou privado que estea autorizado a percibir.

Artigo 12. *Réxime de persoal*

1. O persoal do Instituto Galego de Estatística réxese pola normativa de emprego público e pola lexislación laboral aplicables ao resto do persoal ao servizo da Administración xeral da Comunidade Autónoma.

2. En desenvolvemento da súa estrutura orgánica, o instrumento de ordenación dos postos de traballo do Instituto Galego de Estatística será a súa relación de postos de traballo, na que se determinarán as características de cada un.

CAPÍTULO III

Órganos estatísticos sectoriais

Artigo 13. Natureza

Para desenvolver a estatística galega e, en particular, para aproveitar ao máximo as fontes administrativas, a Presidencia da Xunta de Galicia, as vicepresidencias, as consellerías e, de ser o caso, os órganos e entes públicos dependentes delas, contarán con órganos estatísticos sectoriais, que coordinarán a súa actividade co Instituto Galego de Estatística.

Artigo 14. Funcións

1. Os órganos estatísticos sectoriais terán as seguintes funcións:

a) Elaborar e difundir as estatísticas propias do departamento ou dos seus organismos e entes públicos.

b) Elaborar e difundir as estatísticas ou fases delas que se lles encomenden na planificación estatística.

c) Colaborar co Instituto Galego de Estatística na elaboración do anteproxecto do Plan galego de estatística e dos proxectos dos seus programas, así como na súa avaliación e seguimento.

d) Analizar as necesidades estatísticas do departamento ou dos seus organismos e entes públicos.

2. Os órganos estatísticos sectoriais poderán obter do Instituto Galego de Estatística os datos estritamente necesarios para executar as operacións programadas baixo a súa responsabilidade.

Artigo 15. Designación

A designación dos órganos estatísticos sectoriais determinarase regulamentariamente.

Artigo 16. Persoal estatístico

Ademais do persoal do Instituto Galego de Estatística e dos órganos estatísticos sectoriais, terán a condición de persoal estatístico as persoas empregadas públicas que interveñan na estatística galega.

CAPÍTULO IV

Consello Galego de Estatística

Artigo 17. Natureza

1. O Consello Galego de Estatística é o máximo órgano consultivo da estatística galega, para asegurar a participación dos axentes sociais e económicos e a relación entre Administración e persoas usuarias, así como para promover o seu entendemento e facilitar a coordinación e o uso de metodoloxías comúns.

2. O Consello Galego de Estatística poderá elaborar propostas e recomendacións sobre as necesidades da Comunidade Autónoma en materia estatística, que deberán ser analizadas polo Instituto Galego de Estatística cara á súa incorporación na planificación estatística.

Artigo 18. Funcións

1. O Consello Galego de Estatística será consultado sobre:

- a) O anteproxecto de lei do Plan galego de estatística e os proxectos de decreto dos programas estatísticos anuais.
- b) Os proxectos técnicos das operacións.
- c) A aplicación concreta da lexislación vixente sobre segredo estatístico, nos casos nos que se presenten diferentes interpretacións.
- d) Os anteproxectos de lei ou proxectos de decreto distintos dos previstos na letra a), que sexan de materia estatística.
- e) A adecuación e utilización dos conceptos, definicións, unidades, clasificacións, nomenclaturas, códigos e outros estándares utilizados pola organización estatística galega.
- f) O contido das bases de datos estatísticos consideradas no artigo 27.3.
- g) Os eventuais conflitos de competencia entre órganos estatísticos da Comunidade Autónoma ou con outros alleos a ela.

h) A memoria sobre a actividade da organización estatística galega contemplada no artigo 9.q).

i) Calquera outra cuestión que lle presenten o Consello da Xunta de Galicia ou o Instituto Galego de Estatística.

2. Correspóndelle ao Consello Galego de Estatística aprobar o seu regulamento de funcionamento interno.

Artigo 19. *Composición*

1. Formarán parte do Consello Galego de Estatística as seguintes persoas:

a) A titular da Presidencia, que será a titular da consellería de adscrición do Instituto Galego de Estatística.

b) A titular da Vicepresidencia, que será a titular da Dirección do Instituto Galego de Estatística e que substituirá á persoa titular da Presidencia en caso de ausencia.

c) Unha por cada órgano superior da Administración xeral da Comunidade Autónoma: Presidencia da Xunta de Galicia, vicepresidencias e consellerías.

d) Dúas en representación do Consello das Cámaras de Comercio Galegas.

e) Dúas en representación da asociación empresarial intersectorial máis representativa de Galicia.

f) Tres en representación das organizacións sindicais máis representativas de Galicia.

g) Tres en representación do Consello Agrario Galego.

h) Dúas en representación da Federación Galega de Confrarías.

i) Dúas en representación do Consello Galego de Persoas Consumidoras e Usuarias.

k) Dúas en representación da Federación Galega de Municipios e Provincias.

l) Unha en representación de cada universidade de Galicia.

m) Tres de relevancia profesional no campo da estatística.

n) Unha en representación de cada grupo parlamentario con presenza no Parlamento de Galicia.

ñ) A titular da Presidencia da Sociedade Galega para a Promoción da Estatística e da Investigación de Operacións.

o) Dúas en representación da Administración xeral do Estado. Unha designada polo Instituto Nacional de Estatística e outra pola Delegación do Goberno na Comunidade Autónoma de Galicia.

p) As titulares da secretaria xeral e das subdireccións do Instituto Galego de Estatística, con voz e sen voto.

q) Unha funcionaria do Instituto Galego de Estatística, que actuará como secretaria, con voz e sen voto.

2. A forma de designar ás persoas integrantes do Consello Galego de Estatística determinarase regulamentariamente.

Artigo 20 Funcionamento e medios

1. O Consello Galego de Estatística actuará en pleno e en comisión. As xuntanzas do pleno poderán ser ordinarias e extraordinarias e serán convocadas pola Presidencia. As extraordinarias celebraranse por iniciativa da Presidencia ou á instancia da maioría dos membros do pleno, ou dos da súa comisión permanente.

2. No Consello Galego de Estatística funcionarán unha Comisión de Coordinación e unha Comisión Permanente, que serán presididas pola persoa titular da Vicepresidencia do Consello. A designada como secretaria do Consello Galego de Estatística asumirá a secretaría de ambas comisións.

3. Formarán parte da Comisión de Coordinación as persoas contempladas nos apartados c), p) e q) do artigo 19. A Comisión Permanente estará integrada por once persoas do consello designadas polo pleno coa finalidade de seguir a realización dos programas e debater e informar sobre cuestións semellantes.

4. Para desenvolver as súas funcións, o Consello Galego de Estatística poderá crear grupos de traballo con participación de persoas non pertencentes a el. A secretaría destes grupos de traballo, que deixarán de existir cando remate a misión para a que se crearon, será cuberta por unha persoa funcionaria do Instituto Galego de Estatística, nomeada pola titular da súa Dirección.

5. Os acordos do pleno e das comisións tomaranse por maioría simple, sendo dirimente o voto da persoa que os presida en caso de empate.

6. O Consello Galego de Estatística reunirase en pleno cando menos dúas veces ao ano. Unha destas xuntanzas poderase substituír pola reunión da súa Comisión Permanente.

7. Os medios que precise o consello para o seu funcionamento serán cubertos polo Instituto Galego de Estatística, con cargo ao seu orzamento.

TÍTULO II

Producción estatística

CAPÍTULO I

Planificación da estatística galega

Artigo 21. Plan galego de estatística

1. O Plan galego de estatística é o instrumento de ordenación e planificación da estatística galega.

2. O Plan galego de estatística será aprobado polo Parlamento de Galicia mediante lei e terá unha vixencia de cinco anos, agás que nel se establecer outra diferente, quedando prorrogado ata a entrada en vigor do seguinte.

3. O Instituto Galego de Estatística elaborará, en colaboración cos órganos estatísticos sectoriais, o anteproxecto do Plan galego de estatística e someterao ao Consello Galego de Estatística.

4. O Instituto Galego de Estatística elaborará, en colaboración cos órganos estatísticos sectoriais, un informe de avaliación do Plan galego de estatística, que someterá á consideración do Consello Galego de Estatística e poñerá en coñecemento do Parlamento de Galicia.

5. O Plan galego de estatística contemplará os obxectivos informativos, instrumentais, de calidade ou doutro tipo, por acadar no seu período de vixencia. Os primeiros comprenderán, cando menos, as metas de información, as perspectivas de xénero, de idade ou doutra natureza, e as liñas de actuación salientables.

6. O Plan galego de estatística recollerá as estatísticas consolidadas.

Artigo 22. Programa estatístico anual

1. Para desenvolver e executar o Plan galego de estatística, o Consello da Xunta de Galicia, por proposta da persoa titular do departamento ao que estea adscrito o Instituto Galego de Estatística, aprobará por decreto un programa estatístico.

2. A vixencia do programa coincidirá co ano natural, sen prexuízo da súa prórroga respectando ás estatísticas que, pola súa natureza, sexa necesario continuar.

3. O Instituto Galego de Estatística elaborará o proxecto de programa anual e someterao ao Consello Galego de Estatística.

4. O Instituto Galego de Estatística realizará un informe anual de seguimento do programa, que someterá á consideración do Consello Galego de Estatística e poñerá en coñecemento do Parlamento.

5. O programa incluírá as estatísticas, así como outras actuacións vinculadas cos obxectivos do Plan galego de estatística.

6. Nas estatísticas programadas especificaranse, cando menos e de proceder, os datos seguintes:

- a) Organismos responsables
- b) Metas de información e outros obxectivos informativos
- c) Obxectivos concretos
- d) Ámbitos de investigación
- e) Periodicidade
- f) Orzamento aproximado
- g) Formas e prazos de difusión

7. Nas operacións figurarán tamén o estado e, de proceder, as persoas ou as entidades obrigadas a forneceren información, así como as posibles compensacións establecidas no artigo 25.4.

8. Os órganos da Administración xeral e as entidades instrumentais do sector público autonómico executarán cada programa directamente ou en colaboración con outras entidades públicas ou privadas, mediante acordos, convenios ou contratos. Todas as persoas implicadas quedarán obrigadas a cumprir o segredo estatístico, mesmo logo de que finalicen os ditos acordos, convenios ou contratos.

9. O Instituto Galego de Estatística será, con carácter xeral, o organismo responsable das estatísticas cuxo ámbito de investigación implique varios sectores económicos ou ámbitos sociais e participará na elaboración e

execución das de síntese relacionadas co sistema integrado de contas económicas e das demográficas.

10. Excepcionalmente, por razón de urxencia e para cubrir necesidades de información sobrevidas, o Consello da Xunta de Galicia poderá decidir por decreto que se elaboren estatísticas non incluídas no programa anual, que se someterán con posterioridade ao Consello Galego de Estatística. O Parlamento tamén deberá ser informado de non estar vinculadas con algún obxectivo informativo do Plan galego de estatística. Estas estatísticas gozarán dos beneficios recoñecidos nesta lei.

11. O contido de cada programa e a súa execución estarán suxeitos ás dispoñibilidades orzamentarias e organizativas.

Artigo 23. *Inventario*

1. O inventario é o marco de actuación da organización estatística galega e recolle de xeito sistemático, estruturado e homoxéneo as principais características das estatísticas programadas. Tamén serán inventariadas as contempladas no artigo 22.10.

2. O Instituto Galego de Estatística será o organismo responsable da súa elaboración, mantemento e difusión.

3. Os órganos e entidades do sector público autonómico facilitarán ao Instituto Galego de Estatística información sobre as actuacións estatísticas que realizan para contribuír a un maior coñecemento destas e, de proceder, inventarialas.

Artigo 24. *Proxecto técnico*

1. As operacións executaranse consonte un proxecto técnico, aprobado polo Consello Galego de Estatística e de carácter público.

2. Os proxectos técnicos sistematizarán os procedementos de execución das operacións, especificando os seus obxectivos informativos e como se abordarán as perspectivas que formen parte deles, detallarán a captación ou o soporte que se utilizará para recoller os datos e incluírán o plan de difusión.

3. Os proxectos técnicos elaboraranse de acordo coas instrucións e recomendacións establecidas polo Instituto Galego de Estatística.

CAPÍTULO II

Obtención de información

Artigo 25. *Colaboración cidadá*

1. Será obrigatoria a colaboración cidadá nas operacións dos programas e a información por fornecer axustarse ao establecido nos correspondentes proxectos técnicos.

2. A obriga de fornecer información esténdese a todas as persoas físicas e xurídicas, públicas ou privadas, calquera que sexa a súa nacionalidade, que teñan ou tivesen o seu domicilio ou residencia no territorio da Comunidade Autónoma de Galicia, ou ben desenvolvan ou desenvolvesen algunha actividade nel. Esta obriga poderase estender a actividades que se desenvolvan fóra de Galicia cando fora axeitado á finalidade da operación e estivese previsto no seu proxecto técnico.

3. As persoas físicas e xurídicas, así como as entidades que fornezan datos, tanto se a súa colaboración é obrigatoria como voluntaria, deben contestar ás preguntas ordenadas polos órganos estatísticos de xeito veraz, exacto, completo e dentro do prazo establecido. Tamén facilitarán aos órganos estatísticos o contacto coas persoas designadas por elas para responder á estatística.

4. O programa estatístico anual poderá establecer as compensacións polos gastos extraordinarios que se deriven de fornecer información para unha operación.

Artigo 26. *Solicitud de información*

1. As solicitudes de información feitas desde a organización estatística deberanse limitar aos datos estritamente necesarios para cumprir as finalidades estatísticas perseguidas.

2. A información solicitarase ás persoas ou entidades que proceda, empregando calquera medio que asegure a correcta recepción da solicitude e a comunicación cos servizos estatísticos. Ningunha delas será discriminada á hora de ser elixible para participar nunha estatística.

3. Na solicitude de datos deberase proporcionar información sobre a natureza, as características e a finalidade da estatística, indicando se é obrigatoria total ou parcialmente, cal é a protección que dispensa o segredo estatístico, o prazo de resposta, de proceder, e cales serían as sancións que corresponderían por incumprir as obrigas recollidas nesta lei.

4. As entidades públicas ou privadas que teñan a consideración de informantes están autorizadas a ceder ao órgano responsable de realizar

unha operación datos persoais contemplados no correspondente proxecto técnico, sen necesidade de solicitar o consentimento das persoas interesadas.

5. Os gastos ocasionados aos informantes polos envíos e comunicacións sufraganse con cargo aos orzamentos dos órganos estatísticos.

Artigo 27. Aproveitamento da información dispoñible

1. Para reducir a carga de resposta e mellorar a eficiencia da produción estatística utilizarase como fonte prioritaria de información a contida nos ficheiros de datos estatísticos, administrativos ou doutro tipo.

2. Baixo este principio e para executar a planificación estatística, o Instituto Galego de Estatística terá dereito a solicitar e obter os datos contidos nos ficheiros estatísticos, administrativos ou doutro tipo dos órganos e entidades do sector público. Os seus titulares prestaranlle a máis rápida e áxil colaboración no proceso. Os ficheiros postos á disposición do Instituto Galego de Estatística irán acompañados da metainformación pertinente. De conter identificadores, os ditos ficheiros só se poderán solicitar para desenvolver, elaborar ou difundir operacións.

3. Como ferramentas estatísticas de base, o Instituto Galego de Estatística poderá desenvolver e manter bases de datos a partir do enlazamento de ficheiros de datos estatísticos, administrativos ou doutro tipo, cuxa finalidade será programar estatísticas a partir da súa explotación, garantindo o cumprimento da normativa sobre segredo estatístico.

CAPÍTULO III

Publicidade de resultados

Artigo 28. Difusión

1. A difusión das estatísticas deberase realizar de xeito integrado, obxectivo, oportuno e puntual, acompañada da metainformación e doutra información de apoio á interpretación de resultados.

2. Os resultados das estatísticas difundiranse principalmente por medios electrónicos, de xeito preferente polo organismo responsable da súa elaboración e de acordo cos principios e criterios de calidade contemplados nesta lei, en particular, coa salvagarda do segredo estatístico e a garantía de igualdade de acceso. O Instituto Galego de Estatística poderá solicitar estes resultados para a súa recompilación, almacenamento e difusión.

3. As persoas responsables de elaborar ou difundir estatísticas gardarán reserva sobre os resultados das mesmas ata que se publiquen. Esta reserva non será aplicable á comunicación baixo constrinximento ás autoridades estatísticas e, nas materias da súa competencia, aos órganos estatísticos sectoriais.

4. O acceso aos resultados das estatísticas cuxa difusión estea prevista nos programas anuais será gratuito.

5. Previa a contra-prestación económica que corresponda e sempre que non se altere de xeito significativo o seu normal funcionamento, os órganos estatísticos poderán facilitar a quen o solicite outras elaboracións diferentes dos resultados das estatísticas xa difundidas, que han de reunir as suficientes garantías técnicas e respectar o segredo estatístico.

6. Poderanse difundir microdatos como ficheiro de uso público, integrado por rexistros anónimos e respectuosos co segredo estatístico. Cando for unha terceira persoa a titular da información, solicitarase a súa autorización.

7. As estatísticas difundidas deberán ser reutilizables nos termos previstos na normativa aplicable.

8. O Instituto Galego de Estatística potenciará a interoperabilidade na difusión das estatísticas, fomentando medidas informáticas, tecnolóxicas, organizativas e de seguridade para compartir datos.

9. A web do Instituto Galego de Estatística é o portal da estatística galega, desde o que se debe poder acceder á información producida pola organización estatística galega.

10. As webs da Presidencia da Xunta de Galicia, das vicepresidencias, das consellerías e, de ser o caso, dos órganos e entes públicos dependentes delas, disporán dun apartado específico de estatística para recoller os resultados das súas actuacións dentro dos programas anuais.

Artigo 29. *Conservación*

1. Os órganos estatísticos deberán conservar e custodiar a información obtida como consecuencia da súa actividade, aínda que se difundisen os correspondentes resultados. Na conservación da dita información seguirase a respectar o segredo estatístico.

2. A conservación da información non implicará necesariamente a dos soportes orixinais da mesma, sempre que o seu contido se trasládase a soportes informáticos ou doutra natureza.

3. Cando os órganos estatísticos aprecien que a conservación dalgún tipo de documentación sometida ao segredo estatístico resulte innecesaria, procederán a súa destrución.

4. Os resultados difundidos na web do Instituto Galego de Estatística permanecerán almacenados, agás motivación expresa e previa publicidade.

Artigo 30. *Réxime*

1. Os resultados das operacións programadas son oficiais logo de terse publicados segundo os seus proxectos técnicos.

2. Os resultados correspondentes ás operacións oficiais aplicaranse con preferencia a calquera outro nas relacións e situacións xurídicas respecto ás que a Comunidade Autónoma de Galicia teña competencia.

3. O Instituto Galego de Estatística é o único organismo habilitado para emitir certificacións oficiais respecto dos resultados das estatísticas elaboradas ao abeiro dos instrumentos de planificación estatística da Comunidade Autónoma.

TÍTULO III **Segredo estatístico**

Artigo 31. *Obxecto*

1. Serán obxecto de protección e quedarán amparados polo segredo estatístico os datos persoais obtidos polos órganos estatísticos, tanto directamente dos informantes como a través doutras fontes. Esta protección esténdese aos datos cuxo segredo estea amparado por normas específicas.

2. Aos efectos desta lei, enténdese por segredo estatístico o vinculado co coñecemento que unha persoa posúe como consecuencia da función estatística ou por acceder á información derivada dela. As persoas sometidas ao segredo estatístico quedan obrigadas a non divulgar, comunicar, nin actuar sobre a base deste coñecemento.

3. Os datos sometidos ao segredo estatístico só poderán ser coñecidos polas persoas que deban empregalos para realizar estatísticas ou outras actuacións previstas nesta lei e exclusivamente para a dita finalidade.

4. Os datos persoais obtidos polos servizos estatísticos mediante observación, declaración ou comunicación non producirán efectos noutro ámbito diferente ao estatístico.

5. O dereito das persoas físicas e xurídicas a que se cumpra o deber de segredo estatístico é renunciabile mediante manifestación expresa realizada nun documento escrito.

6. O segredo estatístico será aplicado nas mesmas condicións establecidas neste título fronte a todas as administracións e organismos públicos, calquera que sexa a natureza destes, agás o contemplado nos artigos 14.2, 18.1.c), 33 e 34 e na disposición adicional primeira.

7. Co fin de preservar o segredo estatístico, antes de procesar calquera información separaranse da mesma os identificadores, que se gardarán baixo contrasinais, precintos ou depósitos especiais e se destruírán cando non foren precisos para desenvolver estatísticas.

8. As entidades que participen nos labores previstos nesta lei adoptarán as medidas de índole técnica, funcional e organizativa necesarias para garantir a protección dos datos amparados polo segredo estatístico.

Artigo 32. Ámbito de aplicación

1. Non quedarán amparados polo segredo estatístico:

a) Os datos de coñecemento público, que comprenden os persoais procedentes de fontes públicas e postos legalmente á disposición do público e os publicados lícitamente.

b) As enumeracións de establecementos, naves, empresas, explotacións ou organismos de calquera clase, cando aludan a súa denominación, emprazamento, actividade, enderezo electrónico e teléfono corporativos. As persoas interesadas terán dereito de acceso a estes datos non amparados polo segredo estatístico e a obter a rectificación dos erros que conteñan. O indicador de tamaño poderase difundir agás manifestación en contra da correspondente unidade.

c) O colectivo do apartado anterior incluírá ás persoas físicas só no que respecta á súa actividade empresarial ou profesional e cando a dita actividade fose obxecto de publicidade.

d) Os datos sobre o sector público e os servizos públicos xestionados por persoas privadas, agás disposición legislativa en contra.

2. Á partida, os resultados difundidos consonte aos proxectos técnicos das operacións de síntese non están amparados polo segredo estatístico. No entanto, se unha persoa xurídica interesada manifestar a posibilidade de identificación indirecta de datos persoais, o Instituto Galego de Estatística someterá esta cuestión ao Consello Galego de Estatística, por se proceder a revisión do correspondente proxecto técnico.

3. O deber de manter o segredo estatístico esténdese a todo o persoal estatístico e a cantas persoas, organismos ou institucións de calquera natureza coñezan datos amparados por el con ocasión de participar de xeito eventual nunha fase do proceso estatístico, en virtude de contrato, acordo ou convenio de calquera tipo. O segredo estatístico tamén obriga ás persoas que, sen participaren nos procesos estatísticos, coñezan datos protexidos por el.

4. O deber de segredo estatístico manterase logo de que as persoas obrigadas a preservalo conclúan as súas actividades profesionais ou a súa relación cos órganos estatísticos.

5. Incumprir o deber de segredo estatístico poderá dar lugar a indemnización polos danos e prexuízos causados, con independencia das responsabilidades penais, administrativas ou disciplinarias que resulten esixibles de acordo co previsto nesta lei e no resto do ordenamento xurídico.

6. A obriga de gardar o segredo estatístico iniciárase desde o momento no que se obteña ou coñeza a información por el protexida e manterase durante cincuenta anos, prazo que se pode reducir a vinte cinco anos de coñecerse a data da morte das persoas físicas afectadas ou da disolución das xurídicas. Excepcionalmente, no caso das persoas xurídicas poderanse establecer regulamentariamente períodos menores de duración do amparo do segredo estatístico, que nunca serán inferiores aos quince anos.

Artigo 33. Comunicación de datos persoais para fins estatísticos

1. O Instituto Galego de Estatística poderá facilitar aos órganos estatísticos sectoriais contemplados no capítulo III do título I a información suxeita ao segredo estatístico que precisaren para desenvolver operacións programadas baixo a súa responsabilidade. Cando for unha terceira persoa a titular da dita información, solicitarase a súa autorización.

2. A comunicación do Instituto Galego de Estatística con outras administracións e organismos públicos de datos protexidos polo segredo estatístico só será posible de cumprirse as seguintes condicións:

a) Que os organismos destinatarios teñan expresamente prevista a función estatística na súa norma de creación e dispoñan dos medios necesarios para preservar o segredo estatístico.

b) Que o destino dos datos sexa exclusivamente estatístico e as correspondentes actuacións estean contempladas nos seus instrumentos estatísticos de planificación e programación.

3. A partir de solicitudes debidamente motivadas e cando concorran razóns graves de saúde, o Consello Galego de Estatística poderá, analizando caso por caso, autorizar a comunicación de datos persoais entre órganos ou servizos estatísticos competentes, sempre que se utilicen exclusivamente con fins estatísticos e baixo o compromiso expreso de absoluta confidencialidade sobre os datos comunicados. No caso de persoas xurídicas, ás razóns de saúde sumaranse as graves que afecten á planificación e coordinación económica e á protección do medio ambiente.

4. A información por fornecer contemplada nos apartados anteriores deste artigo será de uso exclusivo do receptor e realizarase na forma máis agregada que sexa compatible coa finalidade para a que se demanda.

Artigo 34. Acceso a datos persoais con fins científicos

1. Para favorecer a investigación e no marco dun proxecto científico específico e de interese público, as universidades e outros centros de investigación recoñecidos poderán acceder a datos protexidos polo segredo estatístico que non permitan identificar directamente ás persoas.

2. A institución solicitante deberá presentar unha instancia na que se indique e motive cales son os datos persoais aos que solicita acceder. Non se dará acceso a ningún dato que non for estritamente necesario para cumprir os obxectivos da institución solicitante.

3. No caso de que a información solicitada fose cedida con fins estatísticos por outro organismo, requirirase a aprobación previa do mesmo.

4. As institucións e persoas investigadoras que teñan acceso a datos persoais estarán obrigadas a gardar reserva absoluta sobre eles e a non difundir ningunha información identificable nos mesmos termos previstos para o persoal estatístico. Tampouco poderán almacenalos nin empregalos para outras finalidades.

5. O Instituto Galego de Estatística establecerá as normas técnicas sobre as modalidades e condicións deste acceso.

TÍTULO IV

Réxime sancionador

Artigo 35. *Infraccións en materia estatística*

1. Son infraccións administrativas en materia estatística as accións ou omisións contrarias ao disposto nesta lei, nos termos recollidos neste título.

2. Serán responsables das infraccións sinaladas as persoas físicas ou xurídicas ás quen lles resulten imputables as accións ou omisións constitutivas das mesmas.

3. As persoas xurídicas responderán do pagamento das sancións impostas como consecuencia das infraccións cometidas polas persoas titulares dos seus órganos, persoal empregado ou axentes.

4. As disposicións deste título non serán de aplicación ás infraccións cometidas por persoal funcionario ou laboral ao servizo das administracións públicas. As devanditas infraccións quedarán suxeitas ao réxime disciplinario regulamentado na normativa específica que resulte aplicable en cada caso.

Artigo 36. *Clasificación*

1. As infraccións ao preceptuado nesta lei clasifícanse en leves, graves ou moi graves.

2. Son infraccións leves:

a) Fornecer información obrigatoria aos efectos estatísticos fóra do prazo establecido, cando esta conduta non producise un prexuízo grave aos órganos estatísticos.

b) Non fornecer información obrigatoria aos efectos estatísticos, ou facelo con datos inexactos ou incompletos, cando esta conduta non producise un prexuízo grave aos órganos estatísticos.

c) A incorrección cos informantes do persoal estatístico ou dos axentes que participan na recolla de datos.

d) A incorrección dos informantes co persoal estatístico ou axentes que participan na recolla de datos.

3. Son infraccións graves:

a) Reincidir na comisión de infraccións leves.

b) Fornecer información obrigatoria aos efectos estatísticos fóra do prazo establecido, cando esta conduta producise un prexuízo grave aos órganos estatísticos.

c) Non fornecer información obrigatoria aos efectos estatísticos, ou facelo con datos inexactos ou incompletos, cando esta conduta producise un prexuízo grave aos órganos estatísticos.

d) Non cumprir a obriga das persoas responsables de elaborar ou difundir estatísticas de gardar reserva sobre os resultados das mesmas ata que se publiquen.

4. Son infraccións moi graves:

a) Reincidir na comisión de infraccións graves.

b) Incumprir o deber de segredo estatístico.

c) Utilizar os datos obtidos polos órganos estatísticos para finalidades distintas das propiamente estatísticas.

d) Fornecer datos falsos aos órganos estatísticos.

e) Esixir información para elaborar estatísticas sen ter a condición de persoal ou axente estatístico.

Artigo 37. Sancións

1. Para graduar as sancións aplicables terase en conta a propia gravidade da infracción, a natureza dos danos e prexuízos causados e a conduta anterior da persoa infractora.

2. As infraccións dos preceptos desta lei serán obxecto das seguintes sancións:

a) As infraccións leves con multas de 60 a 300 euros.

b) As infraccións graves con multas de 301 a 3.000 euros.

c) As infraccións moi graves con multas de 3.001 a 30.000 euros.

3. As infraccións nas que a persoa infractora obtivese un beneficio económico superior ao tope máximo subliñado no punto anterior sancionaranse con multa que pode chegar ata o dobre do beneficio obtido.

4. Entenderase por reincidencia a comisión dunha infracción análoga á que motivou a sanción no prazo dun ano seguinte á notificación da mesma. Neste

suposto requirirase que a primeira resolución sancionadora fose firme na vía administrativa.

Artigo 38. Prescripción

1. As infraccións leves prescribirán aos seis meses, as graves ao dous anos e as moi graves aos tres anos.

2. O prazo de prescripción dunha infracción contarase desde o día no que se cometese.

3. A prescripción dunha infracción interromperase pola iniciación, co coñecemento da persoa interesada, do procedemento sancionador, volvendo a correr o prazo se o expediente permanecer paralizado durante máis dun mes por causa non imputable á persoa infractora.

4. As sancións impostas por infraccións leves prescribirán ao ano, as impostas por infraccións graves aos dous anos e as impostas por infraccións moi graves aos tres anos.

5. O prazo de prescripción dunha sanción contarase desde o día seguinte ao que for executable a resolución pola que se impoñer, ou transcorrer o prazo para recorrela.

6. A prescripción dunha sanción interromperase pola iniciación, co coñecemento da persoa interesada, do procedemento sancionador, volvendo a correr o prazo se o expediente permanecer paralizado durante máis dun mes por causa non imputable á persoa infractora.

Artigo 39. Competencia e procedemento sancionador

1. Correspóndelle á persoa titular da Dirección do Instituto Galego de Estatística impor as sancións polas infraccións previstas nesta lei, previa instrución do correspondente procedemento sancionador e sen prexuízo da existencia das responsabilidades civís, penais ou de calquera orde que poidan concorrer.

2. O procedemento sancionador rexerase polo establecido na normativa reguladora sobre procedemento administrativo común. O prazo máximo para resolver e notificar a resolución expresa que poña fin ao procedemento será de seis meses, a contar desde a data de inicio do procedemento administrativo sancionador, que se corresponde coa data do acordo de incoación. Transcorrido este prazo sen que se notificase a resolución,

producirase a caducidade do mesmo, co arquivo das actuacións, sen prexuízo da obrigaón de ditar a correspondente resolución.

Disposición adicional primeira. *Rexistro de poboación de Galicia*

O Instituto Galego de Estatística poderá crear e manter un Rexistro de poboación de Galicia cos datos do nome, apelidos, domicilio, sexo, data de nacemento e número do DNI, ou do documento que o substitúa no caso de persoas estranxeiras, que consten nos padróns municipais de habitantes de todos os concellos galegos.

En función das previsións sobre transmisións de datos entre administracións públicas contempladas no artigo 155 da Lei 40/2015, do 1 de outubro, de réxime xurídico do sector público, os datos do Rexistro de poboación de Galicia seranlle solicitados ao Instituto Nacional de Estatística, a quen a Lei 7/1985, do 2 de abril, reguladora das bases de réxime local, atribúe a coordinación de todos os padróns municipais.

Os datos do Rexistro de poboación de Galicia poderán ser utilizados pola organización estatística galega para executar a planificación estatística de acordo co previsto nesta lei. Os datos do Rexistro de poboación de Galicia tamén se poderán ceder aos órganos da Administración xeral e do sector público autonómico de Galicia, sen o consentimento previo das persoas interesadas, cando se precisen para exercer unha competencia atribuída por nunha norma con rango de lei, e exclusivamente para asuntos nos que a residencia ou o domicilio sexan datos relevantes.

En relación con esta segunda finalidade, contemplada expresamente no artigo 16.3 da Lei 7/1985, do 2 de abril, reguladora das bases de réxime local e de acordo co previsto sobre protección de datos persoais no Regulamento UE 2016/679, do 27 de abril, e na Lei Orgánica 3/2018, do 5 de decembro, as persoas interesadas poderán exercer perante o Instituto Galego de Estatística os dereitos de acceso, rectificación, supresión e portabilidade dos seus datos, así como limitar ou oporse ao seu tratamento.

Disposición adicional segunda. *Estatística e planificación pública*

Os órganos estatísticos deben impulsar e facilitar o emprego de información estatística para mellorar a avaliación das políticas do sector público autonómico e para programar futuras por emprender. O Instituto Galego de Estatística, a través dos órganos estatísticos sectoriais ou mediante acordo coa Presidencia da Xunta de Galicia, as vicepresidencias ou as consellerías, poderá realizar análises e estudos estatísticos dirixidos ao

seguimento e avaliación de plans, programas, proxectos ou outros aspectos organizativos ou funcionais de interese dos ditos órganos, ou dos entes públicos dependentes deles, que deberán cumprir os principios e normas establecidos nesta lei e nas disposicións que a desenvolvan.

Disposición adicional terceira. Órganos superiores do Instituto Galego de Estatística

De acordo coa Lei 16/2010, do 17 de decembro, de organización e funcionamento da Administración xeral e do sector público autonómico de Galicia, os órganos superiores do Instituto Galego de Estatística son a Presidencia, o Consello Reitor e a Dirección. A Presidencia correspóndelle á persoa titular do departamento de adscrición do Instituto, que tamén presidirá o Consello Reitor, órgano a quen lle corresponde aprobar as contas anuais, o anteproxecto de orzamentos, a contratación de obrigas de carácter plurianual e a proposta de relación de postos de traballo. O Consello Reitor e o Consello Galego de Estatística supervisarán os resultados da actividade do Instituto Galego de Estatística dentro dos seus respectivos ámbitos competenciais.

Disposición adicional cuarta. Plan anual de actuación do Instituto Galego de Estatística

O Plan anual de actuación do Instituto Galego de Estatística, previsto no artigo 70 da Lei 16/2010, do 17 de decembro, recollerá un extracto dos obxectivos que se lle atribúan ao Instituto no programa estatístico do mesmo ano e detallará outros a acadar, xunto cos recursos persoais e orzamentarios precisos. O Plan anual de actuación será aprobado como orde da consellería de adscrición do Instituto Galego de Estatística e os seus resultados someteranse ao Consello Reitor.

Disposición adicional quinta. Acceso ás bases de datos de persoas xurídicas

Para realizar as funcións que se lle atribúan na planificación estatística, o Instituto Galego de Estatística poderá obter das persoas xurídicas os datos ou informacións que teñan almacenados en calquera das súas bases de datos, coa correspondente compensación se proceder.

Disposición adicional sexta. Revisión das contías das sancións

O Consello da Xunta de Galicia poderá actualizar periodicamente a contía das sancións previstas nesta lei, tendo en conta a variación do índice de prezos de consumo e por proposta da persoa titular da consellería de adscrición do Instituto Galego de Estatística.

Disposición derogatoria

Quedan derogadas as disposicións de igual ou inferior rango que se opoñan ao previsto nesta lei e, expresamente, a Lei 9/1988, do 19 de xullo, de estatística de Galicia.

Disposición final primeira. *Desenvolvemento*

O Consello da Xunta de Galicia poderá ditar as disposicións que foren necesarias para desenvolver e executar esta lei.

Disposición final segunda. *Aplicación*

Esta lei entrará en vigor aos vinte días da súa publicación no Diario Oficial de Galicia.